

GST lebih menghimpit golongan miskin, kata PKR
Malaysian Insider
Mei 20,2013
Oleh Mohd Farhan Darwis

PETALING JAYA, 20 Mei — Pengenalan Cukai Barangan dan Perkhidmatan (GST) hanya akan menekan kumpulan majoriti rakyat Malaysia yang berpendapatan rendah berbanding kumpulan minoriti orang kaya, kata ahli Parlimen Kelana Jaya Wong Chen.

Beliau yang juga merupakan Biro Perdagangan dan Pelaburan PKR menegaskan, Barisan Nasional (BN) seharusnya menghapuskan projek mega yang tidak bermanfaat dan menangani rasuah dengan serius bagi menangani “krisis kewangan” sebelum memperkenalkan GST.

“Melainkan jika dan sehingga BN membuktikan ia boleh mengurangkan pembaziran dan membanters rasuah dengan berkesan, kerajaan tidak mempunyai hak untuk memperkenalkan GST,” tegas Wong (gambar) ketika sidang media di Ibu Pejabat PKR di sini.

Beliau yakin BN sedang menghadapi krisis fiskal yang nyata, dan PKR jelasnya percaya punca kepada perkara itu adalah asa cukai yang lemah, pembaziran perbelanjaan dan rasuah yang ketara.

“Sekiranya kesemua perkara itu ditangani, kemudian kami (PKR) akan pertimbangkan untuk laksana GST,” katanya.

Beliau yang memenangi kerusi Parlimen Kelana Jaya dalam Pilihan Raya 2013 lalu menegaskan, pendapatan isi rumah majoriti rakyat Malaysia adalah terlalu rendah dan tidak mempunyai pendapatan mencukupi bagi membayar cukai pendapatan.

Asas cukai yang lemah juga jelasnya adalah berpunca daripada perkara itu dan pelan GST BN adalah regresif dan pada dasarnya akan melihat majoriti rakyat membayar lebih cukai daripada orang kaya.

Tambahnya lagi, kadar tujuh peratus GST yang dibayangkan Menteri di Jabatan Perdana Menteri Datuk Seri Idris Jala, minggu lalu nyata bercanggah dengan cadangan empat peratus yang dikeluarkan Kementerian Kewangan.

Idris sebelum ini berkata Malaysia akan dapat menambah pendapatan jika cadangan dilaksanakan dan mekanisme percukaian baru itu boleh menjamin pendapatan tambahan sebanyak RM20 bilion hingga RM27 bilion sebaik sahaja mencapai tempoh matang.

Cadangan Idris yang berpandukan kepada kadar tujuh peratus GST Singapura sebagai model Malaysia jelas Wong Chen adalah tanpa mengambil kira pelaksanaan awal cukai tersebut di negara republik berkenaan.

Dianggarkan hanya 10 peratus daripada keseluruhan 28 juta populasi rakyat Malaysia yang membayar cukai.

<http://www.themalaysianinsider.com/bahasa/article/gst-lebih-menghimpit-golongan-miskin-kata-pkr1/>